

समे – 12:25

<><><><><><>

PM-Singapur Visit

प्रधानमंत्री नरेन्द्र मोदी जेहड़े सिंगापुर दे दऊं दिने दे दौरे पर न, होरें सिंगापुर दे अपने हमरूतबा लॉरेंस वॉंग हुंदे नै डेलीगेशन स्तरै दी गल्लबात कीती। बैठक दरान दौनें नेताएं भारत सिंगापुर रणनीतिक सांझ-भ्याली च हासल प्रगति दी समीक्षा कीती ते दपक्खी हितें आले इलाकाई ते कुल संसारी सतह दे मुद्दें पर बचार बटांदरा कीता। दौनें मुल्खें सेहत ते दोआइए दे खेत्तर सनें कौशल विकास ते भारत सिंगापुर सैमीकंडक्टर तंत्र सरबंधी सांझ भ्याली बारे सैहमति पत्रें पर दस्तखत कीते। एहदे शा पैहले सिंगापुर दे संसद भवन पुज्जने पर श्री मोदी हुंदा उत्थें रस्मी सुआगत कीता गेआ।

<><><><><><>

JK-3rd Phase Notification

जम्मू कश्मीर च ओंदे विधानसभा चुनां दे त्रीए गेड़ लेई अज्ज अधिसूचना जारी कीती जाग। इस गेड़ तैहत 40 विधानसभा हल्कें पर मतदान होग जिंदे च 24 जम्मू खित्ते दे ते 16 कश्मीर खित्ते दे न। इस गेड़ तैहत नामांकन भरने दी खीरी तरीक 12 सितम्बर ऐ। नामांकन पत्रें दी जांच आला कम्म 13 सितम्बर गी कीता जाग। मेदवार जेकर चाहन तां ओह 17 सितम्बर तगर अपना नामांकन वापस परताई सकदे न। त्रीए ते खीरले गेड़ लेई मतदान पैहली अक्तूबर गी होग। खीरले गेड़ च जम्मू जिले दी 11 विधानसभा सीटें, कठुआ दी 6, उधमपुर दी 4 ते सांबा जिले दी 3 सीटें पर मतदान होना ऐ। चुनां आयोग आस्सेआ जारी ताजा हिदायतें मूजब वोटें दी गिनतरी आला कम्म 8 अक्तूबर गी होना ऐ।

<><><><><><>

JK-2nd Phase Nominations

जम्मू कश्मीर विधानसभा चुनां दे दूए गेड़ तैहत नामांकन भरने दी अज्ज खीरी तरीक ऐ। इस गेड़ तैहत 25 सितम्बर गी 26 विधानसभा हल्कें पर वोट पाए जाने न।

जिंदे च 15 कश्मीर खित्ते दे ते 11 जम्मू खित्ते दे हल्के शामिल न। नामांकन पत्रें दी जांच आला कम्म कल कीता जाग। जिसलै के मेदवार जेकर चाहन तां ओह 9 सितम्बर तगर अपनी नामजदगी वापस लेई सकदे न। जिनें 11 विधानसभा हल्कें पर वोट पाए जाने न उंदे च गुलाबगढ़, रियासी, श्री माता वैष्णो देवी, कालाकोट, सुंदरबनी, नौशेहरा, राजौरी, बुद्धल, थन्नामंडी, सुरनकोट, पुंछ हवेली ते मेंढर शामिल न। 18 सितम्बर गी 24 विधानसभा हल्कें पर वोट पाए जाने न। एह्दे लेई लोड़चदे बंदोबस्त कीते गे न। मतदान अमले गी लोड़चदी सिखलाई दित्ती गई ऐ तां जे चुनां आजादाना, निरपक्ख ते शांतिपूर्ण माहौल च सम्पन्न होई सकन। जम्मू कश्मीर च असेंबली दे चुनां 10एं बरे दे वक्फे मगरा होआरदे न।

<><><><><><>

ECI-Exit Poll Ban

भारतीय चुनां आयोग नै जम्मू कश्मीर च विधानसभा चुनां दरान कुसै बी चाल्ली दे एक्जिट पोल पर पाबंदी लाई दित्ती ऐ। एह पाबंदी भारतीय जन प्रतिनिधित्व अधिनियम 1951 दी दफा 126 ए तैहत लाई गई ऐ। आयोग आस्सेआ जारी अधिसूचना मूजब एक्जिट पोल पर पाबंदी मतदान शुरू होने दे पैहले दिन थमां लागू होग ते मतदान खत्म होने दे अद्धे घंटे तगर जारी रौहग। जम्मू कश्मीर च विधानसभा चुनां त्रै चरणें च होने न, पैहले गेड़ तैहत मतदान 18 सितम्बर गी होग।

<><><><><><>

Prez.-Teachers Awards 2024

राष्ट्रपति द्रौपदी मुर्मू होर अज्ज शिक्षक दिवस दे मौके पर नमीं दिल्ली दे विज्ञान भवन च लगने आले इक समारोह च 82 अध्यापकें गी राष्ट्रीय शिक्षक पुरस्कार 2024 कन्नै सम्मानित करगंन। आकाशवाणी दिल्ली आस्सेआ इस कार्यक्रम दा सिद्दा प्रसारण एफ.एम.गोल्ड, दन्द्रप्रस्त ते आकाशवाणी लाईव न्यूज 24 इनटू 7 पर समां 4 बज्जियै 10एं मिटे पर कीता जाग। इस कार्यक्रम दा सिद्दा प्रसारण आकाशवाणी ए.आई.आर ते आकाशवाणी दे यूट्यूब चैनलें पर बी उपलब्ध रौहग।

हर ब8रे 5 सितम्बर दा ध्याड़ा जेहड़ी जे साबका राष्ट्रपति डॉ. सर्व पल्ली राधा कृष्णन हुंदी जन्म जयंति ऐ, गी राष्ट्रीय शिक्षक दिवस दे रूपे च मनाया जंदा ऐ। केन्द्री शिक्षा मंत्रालय नै आखेआ ऐ जे राष्ट्रीय शिक्षक पुरस्कार देने दा मकसद देसे दे उनें खास टीचरें गी सम्मानित करना ऐ जिंदा शिक्षा दे क्षेत्र च बड़ा मता योगदान होंदा ऐ ते जेहड़े न छड़ा स्कूली शिक्षा दे मयार च सुधार करदे न, सगुआं विद्यार्थिं दे जीवन गी बी अपनी मेहनत ते संपर्ण भाव कन्नै समृद्ध बनांदे न। स्कूली शिक्षा ते साक्षरता विभाग नै ऐकती राष्ट्रीय शिक्षक पुरस्कार लेई 50 टीचरें दी ताल कीती ऐ। एह ताल पूरी चाल्ली पारदर्शी ढंगे नै ते ऑनलाइन त्रऊं चरणे च जिला, राज्य ते राष्ट्रीय स्तर दी प्रक्रिया राएं कीती गई ऐ। उच्च शिक्षा विभाग दे 16 टीचर ते हुनर विकास ते उद्यमता मंत्रालय दे 16 टीचरें गी बी सम्मानित कीता जाग।

<><><><><><>

Teacher Award Greeting

राष्ट्रपति द्रौपदी मुर्मू होरें राष्ट्रीय शिक्षक दिवस दी पूर्व संजा कल सब्बने अध्यापकें गी शुभकामना दित्तियां। अपने इक ममारकी सनेए च राष्ट्रपति होरें आखेआ जे एह ध्याड़ा महान शिक्षा विद, विद्वान ते सांबा राष्ट्रपति डॉ. सर्वपल्ली राधा कृष्णन हुंदी जन्म जयंति ऐ। उनें श्रद्धांजलि भेंट करदे होई द्रौपदी मुर्मू होरें आखेआ जे डॉ. एस.राधा कृष्णन हुंदी जन्म जयंति आला दिन मनाया जंदा ऐ। उनें गी श्रद्धांजलि भेंट करदे होई द्रौपदी मुर्मू होरें आखेआ जे डॉ. राधा कृष्णन समूलचे राष्ट्र लेई इक प्रेरणा न। राष्ट्रपति होरें आखेआ जे बच्चे राष्ट्र दा भविक्ख हुंदे न ते अध्यापक विद्यार्थिं दे नेता दे रूपे च तैआर करदे होई राष्ट्र दा भविक्ख तैह करने च महत्वपूर्ण योगदान दिंदे न। उनें आखेआ जे शिक्षकें दी जिम्मेदारी ऐ जे ओह विद्यार्थिं गी नैतिक मुल्ले—कदरें, तथ्ये पर आधारत ते आलोचनात्मक सोव, हुनर ते समाज लेई जिम्मेदारी दी भावना कन्नै लैस करन।

प्रधानमंत्री नरेन्द्र मोदी होरें शिक्षक दिवस दे मौके पर अध्यापकें गी शुभकामना दित्तियां न। इक सोशल मीडियो पोस्ट च प्रधानमंत्री होरें सारे अध्यापकें प्रति आभार व्यक्त कीता जेहड़े युवा दे भविक्ख गी आकार दिंदे न। उनें साबका राष्ट्रपति डॉ. सर्वपल्ली राधा कृष्णन होरें गी उंदी जयंति दे मौके पर उनें गी श्रद्धांजलि भेंट कीती। उंदी जयंति गी शिक्षक दिवस दे तौर पर मनाया जंदा ऐ।

उपराज्यपाल मनोज सिन्हा होरें शिक्षक दिवस दे मौके पर सारे अध्यापकें गी बधाई दित्ती ऐ।
अपने इक सनेह च उपराज्यपाल होरें महान शिक्षविद् ते भारत दे साबका राष्ट्रपति डॉ.
सर्वपल्ली राधा कृष्णन होरें गी श्रद्धांजलि भेंट करदे होई आखेआ जे उंदा जीवन ते उंदा
कम्म औने आलिएं पीढ़िएं गी बी प्रेकरत करदा रौहग। उनें आखेआ जे शिड़क सेई मायने च
राश्ट्र दा निर्माण करदा ऐ ते अध्यापक इक्कै समें पर केई सारी भूमका नभांदे न।

<><><><><><>